

茶林
泉山
結集
契集



茶 山 集



王雲五主編

叢書集成初編

茶山集及其他一種

中華民國二十六年十二月初版

發行人

王

雲

五

長沙南正路

印刷所

商

務

印書館

長沙南正路

發行所

商

務

印書館

各埠

壽

F八三七平

合

叢書集成

初編

主編者
王雲五

商務印書館發行

本館據聚珍版叢
書本排印初編各
叢書僅有此本

四庫全書總目提要

茶山集宋曾幾撰。幾字吉甫，贛縣人。徙居河南，以兄弼卹恩授將仕郎，試吏部優等，賜上舍出身。歷校書郎，高宗朝歷江西浙西提刑，忤秦檜去位。僑寓饒茶山寺，自號茶山居士。檜死，召爲祕書少監，權禮部侍郎，提舉玉隆觀。年七十九致仕。越三年卒。諡文清。陸游爲作墓誌云：公治經學道之餘，發于文章，而詩尤工。以杜甫、黃庭堅爲宗，而魏慶之詩人玉屑云：茶山之學出于韓子蒼。蓋韓駒詩法得自庭堅，而庭堅又刻意以學杜甫。句律淵源，遞相祖述，其實一而已矣。後幾之學傳于陸游，加以研練，面目略殊。遂爲南渡之大宗。殆有出藍之譽。然幾詩風骨高蹇，而含蓄深遠，介乎豫章、劍南之間。亦豈遽爲蜂腰哉。趙仲白題其集曰：清于月，白初三夜，淡似湯烹第一泉。咄咄逼人，門弟子劍南已見一燈傳。是當時固有公論也。又陸游跋幾奏議稿曰：紹興末，先生居會稽禹跡精舍，某自敕局歸，無三日不進見，必聞憂國之言。先生時年過七十，聚族百口，未嘗以爲憂。憂國而已。據此則幾之一飯不忘君，殆與杜甫之忠愛等。發之文章，具有根柢，不當僅以詩人目之。求諸字句間矣。墓誌稱有文集三十卷，易釋象五卷，易釋象已不傳。其集則文獻通攷及宋史均作十五卷。然通攷列之詩集類中，疑三十卷者指其詩文全集，而十五卷則專指詩集也。自明以來，傳本久佚，僅僅散見各書，偶存一二。茲從永樂大典中搜採編輯，勒爲八卷。凡得古今體五百六十一首，雖不足盡幾之長，然

較相傳九百一十篇之數。所佚者不過三百四十九篇耳。殘膏賸馥。要足沾丐無窮也。

茶山集目錄

卷一

五言古詩三十二首

卷二

五言古詩四十六首

卷三

七言古詩三十一首

卷四

五言律詩一百二十八首

五言排律五首

卷五

七言律詩八十二首

卷六

七言律詩六十四首

卷七

五言絕句五十三首

六言絕句七首

卷八

七言絕句一百十三首

茶山集卷一

五言古詩

宋 曾 幾 撰

尋春次曾宏甫韻〔案〕曾宏甫名惇，避宋光宗諱，以字行。紆之子。羣之姪孫。陳振孫書錄解題：曾氏明同姓不宗之意。

春山數峯青，春水一溪綠。幽尋山水間，物物可寓目。花香若三薰，柳色若新沐。吾儕幸閒放，晴晝頗連屬。胡爲深閉門，終日仰看屋。嘉招儻亟拜，豈敢憚僕僕。請君攜壺去，政恐日不足。小槽雖蜜甜，何必待醅醑。茗事姑置之，雷車困枵腹。〔案〕甫詩：有家貧只舊醅，不辨樽中醪。但煮官焙香，炊飯鱸魚腹之句。且云：家釀甜甚，不堪饕客也。

次范益謙遷居九江經過上饒見贈韻

君爲九江行，意有風雨快。維舟玉溪畔，未割故人愛。停杯一問我，請以所聞對。九江萬事好，賞詠看前輩。巖巖匡廬廬，〔案〕後漢書郡國志注：釋慧遠廬山記：畧有匡俗先生，出殷周之際，隱居此山，時謂所止爲仙人之廬，而命焉。又案豫章舊志：匡俗字君平，夏禹之苗裔也。原本避宋太祖諱，作正俗。今校改。頂踵極高大，其中藏曲折。願勿遺瑣碎，煙波溢浦游。風月庾樓會，以茲供筆硯。安得有蕪累，矧君著幽禪。直欲入三昧，飽參山南北。毋問人顯晦，歸來亦何云。聖處果安在，要知方策間。卽有文字外，我今如是說。初不墮荒怪，屋漏實臨之。斯言尙無愧。

次陳少卿見贈韻

少卿令德公。不肯入州府。種花養風煙。藝木蔭庭宇。了無適俗韻。真可與晤語。永懷君詩句。小卿詩說往時行朝以雪

和句唱淨洗我塵土。如何百里間。此祕欠未覩。今晨款荆扉。老氣壓方虎。新詩疾雨風。妙字列行伍。華宗有

后山。句律嚴七五。豫章乃其師。工部以爲祖。君方討淵源。奚啻窺牖戶。我貧無一錢。不敢學農圃。空餘數

卷書。腸腹自撐拄。

陳卿又和三首而仲通判亦三作嚴教授再賦皆有見及語予不可以無言故復次韻

官屬遂中書。朝班高太府。陳卿貳太原府兼中書檢正陳卿掉臂去。偃仰一茅宇。臨池看魚樂。坐樹聽鳥語。脩竹手所

栽。薪萌爭上土。天開重新運。聖作萬物覩。會合如風雲。吹噓者龍虎。陳卿落閒處。問孰與爲伍。毛穎傳中

人。渠儂適成五。詩章出咳唾。流派攷宗祖。仲嚴更獻酬。胸次非小戶。覽觀不暇給。爛若花藥圃。可畏韻險

艱。浮梁裊相拄。〔案〕此句用杜甫龍門閣詩全句原本誤裊今改正

沈明遠作詩教授用東坡仇池石韻賦予所蓄奇石次其韻

維南有絲溪。溪石如水綠。瞻相百里間。抱負一夫足。聲名作災怪。攻取及背腹。在者略無奇。溪神爲顰蹙。

螢煙瘴雨地。故舊實州牧。坐令數峯青。飛過大江濱。何嘗說向人。恐類和氏玉。公然遭奪攘。不使得藏伏。

廣文到吾廬。索隱妙著卜。東坡韻險艱。句句巧追逐。幽人所好山。已占一林谷。又兼小崢嶸。無乃太多欲。

端如耐久朋。相與會心曲。大勝輕薄兒。浮雲變何速。

次綠字韻

舍前南山青。舍後北山綠。捫蘿陟其巔。策杖遶其足。中間奇絕處。表裏見心腹。登臨豈不佳。老境日以蹙。誰知怪石供。能坐我郊牧。政應索幽遐。何憚越川瀆。嶽巖庾嶺南。美者色蒼玉。賞音無東坡。尤物多跼伏。仇池蓋南石也。今年致書求。屢以可否卜。故人爲遣送。健步遠相逐。雖非古仇池。要是好崖谷。似爲天所矜。此段獨從欲。深慚昇致重。路轉知幾曲。安得滄海神。鞭笞使之速。

還守台州次陸務觀贈行韻

蟬噪高柳岸。鷺飛遠沙汀。蕭然感予懷。清靜游神庭。老樹失故綠。殘芳謝微馨。胡爲趣召節。日日晨昏星。放纜西興渡。落帆浙江亭。恭惟陛下聖。萬國瞻儀刑。黼座懸日月。孤燈耿熒熒。況復如許病。自知不能廷。所以乞閒散。庶幾守沈冥。方虞秋霜嚴。翻得春露零。再聞芸草香。一洗海物腥。父老喜我來。無異化鶴丁。兒童喜我來。小駟騎青青。諒有隔生契。不然定誰令。四海習鑿齒。幾年讀書螢。新詩中律呂。雖美無人聽。鳴聲勿浪出。坐待軒皇伶。

次折仲古避寇潯州韻

我持十口家。不辦一葉船。賊聲日夜急。欲濟江無邊。身雖墮晉井。仰視猶有天。天理儻未爽。偷兒浪垂涎。洗心占羅池。稽首依靈泉。竟以妻子免。百神果昭然。得從潯江遊。未斷龍城緣。爲問米何如。買禾可論廛。向來魚菜市。十戶八九旋。令我喜折屐。喜定翻悲憐。王師靜江南。趨者不摩肩。一日百回首。我非強項宣。

盛欲徑梅庾。不然傍郴連。終鮮孔方兄。留滯等謫遷。尙念吾鼻祖。永懷舊山川。往還武城居。家風到今傳。我方尋昨夢。一舸百笮牽。而公下劈箭。〔案〕劈箭二字。見韓愈岳陽樓詩。原本箭誤。剪今改正。如駟駿得鞭。江村索居地。未敢高枕眠。世事公等在。歸與有逢年。

次雪峯空老韻二首

雪峯僧中龍。此道誰與共。蕭然兩伽陀。不舉似大衆。獨貽茶山老。以當蒲塞供。巖花與澗草。信手拈來用。獨烹茶山茶。未對雪峯雪。須知千里間。只共一明月。陳家參玄人。道眼應一瞥。爲語管城君。相從熾然說。

贈疎山清老

江西草堂清。道價直寰宇。中分死心坐。親飲晦堂乳。與人作陰涼。雨後散煩暑。千林搖落後。鬱鬱松柏古。龐頭覆霜雪。碧眼照針縷。貫穿禪家流。領略我輩語。居山專論道。餘事百不覩。人言師疎慢。我但見媚嫵。去年瀟湘來。叢席歷幾所。踞堂號知識。說法若雲雨。陰求乃翁事。未見一人舉。請師長住世。此道要盟主。杖拂有餘閒。時時入州府。

贈空上人

我塞空門秀。得之古疎山。斯人器玉壺。中有寶月寒。四壁澹相對。安身一蒲團。玲瓏六牕靜。竟日心猿閒。時從禪郎起。游戲于筆端。當其參尋時。恣意雲水間。松風漱齒頰。蘿月入肺肝。政使不學詩。已見詩一斑。況復用心苦。俗氛何由干。今晨出數篇。秀色若可餐。清妍梅著雪。圓美珠走盤。乃知心鏡中。萬象紛往還。

皆吾所現物。摹寫初不難。誰能效我輩。造語出險艱。請師臙汲古。淨洗蔬腸酸。坐令韓退之。收斂加巾冠。
送祕丞羅庭揚孝芬將漕湖北

湖南八九州。海內清絕地。與公白雞年。〔案〕白雞年。謂西漢武帝時。白雞。本晉書謝安傳。接翼鴻鴈使。高堂親八十。無復遠遊意。奉承萬事了。趨走三節至。詔書引上殿。帝曰。汝國器。置之蓬萊山。身亦典中祕。乖離如許久。會念差足慰。胡爲未暖席。歸與不可制。人生故鄉樂。況攬澄清轡。皇華遣使臣。光采寧有是。紅塵跨羣馬。老矣殊少味。著鞭輸公先。吾亦從此逝。

贈趙判官壽卿彥齡二首

身爲高帝孫。面作寒士氣。緣情德麟語。寫物大年意。青雲無蘇黃。何以致後世。聰明几靜間。是事且遊戲。
得州敢爲榮。得士乃足詫。此郎精琴書。不獨妙詩畫。雖云于小道。舉不在人下。無乃太不廉。誰知非譏罵。
趙能詩畫篆隸撫琴

王巖起樂齋

歡悵挽不來。愁思推不去。達人方寸地。固自有樂處。得非山林歟。或用詩酒故。一朝不在眼。便覺少佳趣。
人言顏子樂。瓢飲映蔬茹。何曾夢見渠。浪自起欣慕。此君與天游。于物初不寓。攜持小齋名。扁榜隨所住。
要知真樂事。未省離跬步。我亦欲歸顏。〔案〕歸顏二字。見法言學行篇。原本顏誤彥。今改正。從君尙能屢。

題張彥實舍人墓下湧泉亭

紫薇花底人。去作泉下夢。佳城閉青春。風木號永痛。寒泓孰出之。甘冽可抱甕。乃知主地神。效此清淨供。汲引入中廚。色味勝乳湏。老龍來試詩。事有萬鈞重。程伯禹龍閣命名作詩寄聲松大夫。并語石翁仲。俱修護持職。以遺雲來用。

題盛彥光少府丘壑軒

何許覓丘壑。不專在山林。胸次儼蕭散。市朝有幽尋。只今謝幼輿。超然抱遐心。俯仰得佳趣。何嘗日登臨。我雖非夔曠。粗亦能賞音。不用一再鼓。山高水深深。

題黃嗣深家所蓄惠崇秋晚畫

叢蘆受風低。積潦得霜淺。沙勻洲渚淨。水澹鳬鴨遠。禪扉掩晝夜。短紙開秋晚。欲問此間詩。半山呼不返。題程伯禹給事漫吾亭

漫郎專一溪。萬事俱不理。胡爲墮我相。名字出奇詭。山林軒冕歟。等是寄焉耳。程公榜亭意。道眼深照此。端居亦偶然。小出聊復爾。宣城幻事了。卻夢歸故里。結廬澄潭上。盡室清鏡裏。木陰涼夏簟。荷氣馥秋水。遙岑招不來。爲我列牕几。昔吾與今吾。念念如脫屣。心期次山外。人要安石起。公勿賦遠遊。行應去天咫。

題南嶽銓德觀秋聲軒

月明鴈叫遠。露下蟬號寒。幽幽草蟲泣。索索梧葉乾。愁人知秋早。聽此良獨難。竹君南北美。佩服青琅玕。天風一披拂。庭宇聲珊珊。靈宮蔭老樾。別館如深山。心淨鑒止水。眼明揖千竿。虛籟自然奏。有琴不須彈。

世議大可厭。市聲無少閒。不如聽君語。竟日簾垂閒。

題臨川宰徐伯章心遠軒

徐侯心萬里。身墮百里中。政以詩禮庭。上有鶴髮翁。豈無敲榜喧。不入丘壑胸。開軒寄遠韻。几淨牕玲瓏。竹影落夏簾。水光搖秋空。一對鳬鷺行。萬里牛馬風。悠然見南山。不與俗眼同。徐侯歸去來。三徑資已豐。身將心共遠。勿爲督郵恭。

春初過王仲禮教授小園

幽居倦孤寂。俗駕難追攀。相攜筇九節。徑造茅三間。王卿貧無事。況得獨冷官。衡門靜如水。委巷深于山。自言學爲圃。雖小殊可觀。始至度略約。徐行轉闌干。當階藝紅藥。坐待青春還。春還未數日。草樹猶清寒。殷勤小梅花。一笑冰雪顏。煮茗當酒醴。言詩替吹彈。君知靜中勝。得此良獨難。相戒勿浪出。黃塵點人冠。

汪惇仁教授卽官舍作齋予以獨冷名之

昔君困蠶鹽。蓬首牕下讀。秋螢屢乾死。明月以爲燭。麻衣肘欲穿。才換一袍綠。豈知冷淡債。十載償未足。書齋開冰廳。敗壁數椽屋。橫經綴鵲鷺。未省進鳬鷺。窮通更事耳。裘扇有反覆。直今張羅地。便恐車擊轂。先生粲可流。示現著冠服。從渠勢炙手。了不見涼燠。小詩應大笑。笑我未忘俗。

董令升舍人朋溪圖趙祖文筆也

谷風不須歌。朋友道缺絕。請歌伐木詩。歌罷聽吾說。漢朝儒宗系。今代侍臣傑。甘泉久論思。陽羨小休歇。

郊園谷幽幽。喬木覆清樾。百禽鳴其間。相喚極可悅。坐令公感慨。朋好苦難結。不如侶荆溪。迴與世情別。淡乎若無味。了不見涼熱。是以樂從之。諸峯況羅列。趙侯有能事。短紙藏曲折。更作陶淵明。飄飄弄明月。

相馬圖呈杜勉齋左司

造物出萬類。貴賤伊誰分。圭璋雜瓦礫。世道同疎親。既收大宛種。一掃鶩駘羣。乃觀相馬圖。低首先吟呻。千金購死骨。舉國無其真。生死何太晚。鹽車負艱辛。悠悠虞阪道。赤日煎紅塵。行人亦何多。具眼惟孫君。一顧不旋踵。價越連城珍。誰爲繪此像。庸示將來人。相馬失之瘦。相士失之貧。于茲有鉅公。數載居沈淪。涵養浩然氣。輪蹄任紛紜。素識太平相。鶚表飛青雲。紫泥日邊下。八座生陽春。攄心握文柄。引年啓賢門。凝睇辨臧否。立志安斯民。他時了經濟。丹青畫麒麟。回顧相馬者。細務何足云。寥寥載千古。二道非同倫。相士今何人。少陵身後身。

紹興帥相湯公會五客蓬萊閣登望海亭屬某賦詩

徐稷山、朱新仲、王宣子、胡周伯及某。

赫赫會稽郡。潭潭府公居。一州勝絕處。畢集于庭除。秦望極高秀。千峯散江湖。蓬萊爲收攬。遠近爭奔趨。溟渤無百里。登臨失東隅。羣飛臥龍頂。便可窺方壺。丞相不獨饗。故人盛招呼。兵廚列樽俎。賓次羅簪裾。傑閣坐褰帶。危亭上肩輿。毫倪爭指似。還見雲間無。一月明白壁。五星燦連珠。鄙夫何足數。愧汗沾霜鬚。客有徐季海。題名數行書。怒猊抉石外。筋力顏之徒。周老盡命駕。屬聞遂懸車。何妨行役事。政用兒孫扶。

陸務觀讀道書名其齋曰玉笈